

Ufråvikeleg lovnorm

Idrettsrådet skal ha ei lov som er i samsvar med NIF-lova og denne lovnorma. Lova skal godkjennast av idrettskretsen. Lovnorma er ufråvikeleg og inneheld eit minimum av det idrettsrådet må ha i si eiga lov. NIF-lova og lovnorm for idrettsråd skal leggjast til grunn i alt lovarbeid i idrettsrådet.

Lovendringar

Alle lovendringar må vedtakast på ordinært eller ekstraordinært årsmøte etter å ha vore ført opp på saklista, og krev 2/3 fleirtal av dei avgjevne stemmene. Lovendringane må sendast til idrettskretsen for godkjenning. Lovendringar i idrettsrådet si lov som følgje av endringar i NIF-lova, trer i kraft straks. Lovendringar vedtekne av idrettsrådet sjølv trer ikkje i kraft før dei er godkjende av idrettskretsen. Ved endring av lova kan idrettsrådet leggje til det idrettsrådet sjølv vurderer som nødvendig å ha regulert i eiga lov.

Motstrid mellom idrettsrådet si lov og NIF sitt regelverk/lovnorm

Tillegga/endringane i idrettsrådet si lov kan ikkje vere i strid med NIF sitt regelverk (NIF-lova, reglar og forskrifter) eller mot denne lovnorma. Ved eventuell motstrid mellom ein regel i idrettsrådet si lov og NIF sitt regelverk/lovnorm, vil regelen i idrettsrådet si lov vere tilsvarende ugyldig.

NIF-lova, reglar og forskrifter er tilgjengeleg på www.idrett.no

LOVNORM FOR IDRETTSRÅD (nynorsk)

(Vedteken av Idrettsstyret 28. november 2011)

Lov for Kvinnherad idrettsråd, skipa(dato/år), vedteke av årsmøtet(dato/år), godkjend av Hordaland Idrettskrets (dato/år).

I. INNLEIANDE REGLAR**§ 1 Formål**

(1) Idrettsrådet skal arbeide for best moglege vilkår for idretten i kommunen. Idrettsrådet skal vere ein arena for samarbeid mellom laga, mellom laga og kommunale styresmakter og mellom laga og idrettskretsen.

(2) Arbeidet skal pregast av frivilligheit, demokrati, lojalitet og likeverd. All idrettsleg aktivitet skal byggje på grunnverdiar som idrettsglede, fellesskap, helse og ærlegdom.

§ 2 Organisasjon

(1) Idrettsrådet er eit felles organ for all idrett i kommunen som er organisert i Norges idrettsforbund og olympiske og paralympiske komité (NIF) gjennom idrettskretsen. Idrettslag i Kvinnherad kommune med medlemskap i NIF vert automatisk medlem av idrettsrådet.¹

¹ Idrettslaget kan berre vere medlem av eitt idrettsråd. Dersom det naturlege området for eit idrettslag strekkjer seg over meir enn ein kommune, avgjer laget sitt årsmøte ved lovvedtak kva for idrettsråd det vil vere med i. Med dispensasjon frå Idrettsstyret kan det opprettast felles idrettsråd for to eller fleire kommunar.

(2) Bedriftsidretten sin tilknytning til idrettsrådet vert fastsett på idrettsrådet sitt årsmøte, jf. §13 (1) bokstav c).

(3) Idrettsrådet skal følgje NIF og tilslutta organisasjonsledd sitt regelverk og vedtak. NIF-lova gjeld for idrettsrådet uavhengig av kva som måtte stå i idrettsrådet si eiga lov.

§ 3 Oppgåver²

(1) Idrettsrådet skal:

- a) Styrke idretten si rolle og rammevilkår i lokalsamfunnet.
- b) Gjere prioriteringar på vegne av idrettslaga.
- c) Dokumentere og synleggjere idretten sitt lokale omfang, samt utvikle lokale idrettspolitiske handlingsprogram.
- d) Vere ein møteplass og utviklingsarena i skjeringspunktet mellom offentleg og frivillig virke.

(2) Idrettsrådet skal vere eit idrettspolitisk organisasjonsledd med oppgåver primært på lokalt nivå.

(3) Alle saker som er av felles interesse for idretten skal sendast til kommunen gjennom idrettsrådet.

§ 4 Kontingent

(1) Er kontingent innført, vert denne fastsett av årsmøtet i idrettsrådet for det påfølgjande kalenderåret.

(2) Skuldig kontingent fører til tap av stemmerett og andre rettar på årsmøtet i idrettsrådet.

II. TILLITSVALDE OG TILSETTE

§ 5 Kjønnfordeling

(1) Ved val/oppnemning av representantar til årsmøte/ting, samt medlemmer til styre, råd og utval m.v. i idrettsrådet, skal det veljast personar frå begge kjønn.

(2) Samansetjinga skal samsvare i høve til kjønnfordelinga i medlemsmassen, likevel slik at det skal vere minst to personar frå kvart kjønn der det blir valt eller oppnemnt meir enn 3 personar. Der det blir valt eller oppnemnt 3 personar eller færre, skal begge kjønn vere representert. Representant for dei tilsette tel ikkje med ved utrekning av kjønnfordelinga.

(3) Idrettskretsen kan, når det ligg føre særlege tilhøve, gjere unntak frå denne regelen.

(4) Idrettsstyret kan gi forskrift om nærare vilkår for dispensasjon og konsekvensane av manglande oppfylling av regelen.³

§ 6 Generelle reglar om stemmerett, kven som kan veljast, forslagsrett m.v.

² Lista over idrettsrådet sine arbeidsoppgåver er minimum av det idrettsrådet si lov skal innehalde. I tillegg kan andre oppgåver også leggjast til idrettsrådet.

³ Sjå forskrift til NIF-lova § 2-4.

(1) For å ha stemmerett og kunne veljast må ein vere fylt 15 år, vore medlem av eit idrettslag i minst ein månad og ha oppfylt medlemskrava. Ingen kan møte eller stemme ved fullmakt.

(2) Ein arbeidstakar i eit idrettsråd har ikkje stemmerett på idrettsrådet sitt årsmøte.

(3) Ein person kan ikkje samtidig ha meir enn eit av følgjande verv i idrettsrådet: medlem av styret, valkomiteen, kontrollkomiteen, revisor.

(4) Revisor har talerett på idrettsrådet sitt årsmøte i saker som ligg innanfor sitt arbeidsområde.

(5) Representant frå overordna organisasjonsledd har talerett på idrettsrådet sitt årsmøte.

(6) Med forslagsrett er meint retten for representant til å fremje forslag under idrettsrådet sitt årsmøte. Berre idrettslag/bedriftsidrettslag med representasjonsrett kan fremje forslag til handsaming på årsmøtet i idrettsrådet.

§ 7 Kven som kan veljast, og representasjonsrett for arbeidstakar og oppdragstakar

(1) Ein arbeidstakar i idrettsrådet kan ikkje veljast til verv i idrettsrådet eller overordna organisasjonsledd. Tillitsvalt som får tilsetjing i idrettsrådet pliktar å gå ut av tillitsvervet, og går inn att i vervet når tilsetjingstilhøvet er avslutta.

(2) Ein arbeidstakar i idrettsrådet kan ikkje veljast eller oppnemnast som representant til ting eller møte i overordna organisasjonsledd.

(3) Regelen skal brukast tilsvarande på person som har oppdragsavtale som i omfang kan samanliknast med eit tilsetjingstilhøve i idrettsrådet.

(4) Denne regelen er ikkje til hinder for at idrettsrådet gir dei tilsette rett til å peike ut ein eller fleire medlemmer mellom dei tilsette til idrettsrådet sitt styre.

(5) Idrettsstyret eller den det gir fullmakt⁴, kan, når det ligg føre særlege tilhøve, gi dispensasjon.

(6) Idrettsstyret kan gi forskrift om nærare vilkår for dispensasjon.⁵

§ 8 Inhabilitet

(1) Ein tillitsvald, oppnemnd representant eller tilsett i idrettsrådet er inhabil til å leggje til rette grunnlaget for ei avgjerd eller til å treffe avgjerda:

- a) når vedkomande sjølv er part i saka.
- b) når vedkomande er i slekt eller svogerskap med ein part i oppstigande eller nedstigande linje eller i sidelinje så nær som søsken.
- c) når vedkomande er eller har vore gift med eller er forlova eller sambuar med ein part.
- d) når vedkomande er leiar for eller har leiande stilling i eller er medlem av styret i eit organisasjonsledd eller annan juridisk person som er part i saka.

(2) Sameleis er vedkomande inhabil når andre særleine tilhøve ligg føre som er eigna til å svekke tilliten til om vedkomande er upartisk; mellom anna skal det leggjast vekt på om

⁴ Avgjerdsmakta er delegert, jf. Delegasjonsreglementet

⁵ Sjå forskrift til NIF-lova §§ 2-6 og 2-7.

avgjerda i saka kan gi særleg fordel, tap eller ulempe for vedkomande sjølv eller nokon som vedkomande har nær personleg tilknytning til. Det skal også leggjast vekt på om inhabilitetsmotsegn er reist av ein part.

(3) Er ein overordna inhabil, kan avgjerd i saka heller ikkje treffast av direkte underordna i idrettsrådet.

(4) Inhabilitetsreglane skal ikkje brukast dersom det er innlysande at den tillitsvalde, oppnemnde representanten eller tilsette si tilknytning til saka eller partane, ikkje vil kunne påverke vedkomande sitt standpunkt og idrettslege interesser ikkje tilseier at vedkomande bør vike sete.

(5) Med part er det her meint person, medrekna juridisk person, som ei avgjerd rettar seg mot eller som saka elles direkte gjeld.

(6) I styret, komitear og utval tek organet sjølv avgjerd, utan at vedkomande medlem deltek. Dersom det i ei og same sak oppstår spørsmål om inhabilitet for fleire medlemmer, kan ingen av dei delta i avgjerda av sin eigen eller ein annan medlem sin habilitet, med mindre organet elles ikkje ville vere vedtaksført i spørsmålet. I sistnemnde tilfelle skal alle møtande medlemmer delta. Medleimen skal i god tid seie frå om tilhøve som gjer eller kan gjere vedkomande inhabil. Før spørsmålet vert avgjort, bør varamedlem eller annan person som kan tre inn i staden for, kallast inn til å møte og delta i avgjerda, dersom det kan gjerast utan vesentleg bruk av ekstra tid eller kostnad.

(7) Ved andre høve tek vedkomande sjølv avgjerda om vedkomande er inhabil. Dersom ein part krev det, og det kan gjerast utan vesentleg ekstra bruk av tid, eller vedkomande elles finn grunn til det, skal vedkomande sjølv leggje fram spørsmålet for sin næraste overordna til avgjerd.

§ 9 Krav til vedtak, fleirtalskrav og protokoll

(1) Når ikkje anna er bestemt, er styre, komitear og utval i idrettsrådet vedtaksføre når eit fleirtal av medlemene er til stades. Vedtak vert fatta med fleirtal av dei gjevne stemmene. Ved likt stemmetal er møteleiar si stemme avgjerande.

(2) Vedtak kan fattast ved skriftleg sakshandsaming⁶ eller ved fjernmøte⁷. Ved skriftleg sakshandsaming skal kopiar av dokument i saka sendast samtidig til alle medlemmer med forslag til vedtak. Gyldige vedtak krev at fleirtalet av medlemene gir sin tilslutnad til det framlagde forslaget, og til at dette vert gjort etter skriftleg sakshandsaming. Ved fjernmøte skal alle møtedeltakarane kunne høyre og kommunisere med kvarandre.

(3) Det skal førast protokoll frå styremøta.

§ 10 Tillitsvalde og refusjon av utgifter og tapt arbeidsforteneste. Godtgjersle

Tillitsvalde kan ta i mot refusjon for nødvendige, faktiske utgifter, inkludert tap av arbeidsforteneste, som vedkomande får i samband med utføring av vervet. Tillitsvalde kan ta i mot ei rimeleg godtgjersle for arbeidet sitt. Refusjon for tapt arbeidsforteneste og godtgjersle skal gå fram av vedteke budsjett og rekneskap. Styrehonorar skal kome fram i årsmeldinga.

III. ØKONOMI

⁶ Til dømes møte per e-post

⁷ Til dømes møte per telefon/videokonferanse

§ 11 Rekneskap, revisjon, budsjett m.v.

- (1) Idrettsrådet er rekneskaps- og revisjonspliktig.
- (2) Idrettsråd med ein årleg omsetnad på under kr 5 millionar skal følgje NIF sine rekneskaps- og revisjonsreglar. Andre idrettsråd skal følgje rekneskapsreglane i rekneskapslova og revisjonsreglane i revisorlova, og skal engasjere revisor og velje kontrollkomité. Kontrollkomiteen sine oppgåver følgjer av NIF-lova § 2-12.
- (3) Bankkonti skal vere knytt til idrettsrådet og skal disponerast av to personar i fellesskap. Underslagforsikring skal vere teikna for dei som disponerer.
- (4) På årsmøtet skal det fastsetjast eit budsjett som inneheld alle hovudpostar i resultatrekneskapen.
- (5) Budsjettet skal vere realistisk, og resultatet skal ikkje vise underskot med mindre det vert dekt av positiv eigenkapital.
- (6) Idrettsrådet kan ikkje gi lån eller stille garantiar for lån dersom lånet eller garantien er sikra med trygg pant eller annan fullgod sikring. Sikring for lån og garantiar skal opplysast i note til årsoppgjeret. Idrettsrådet kan likevel delta i NIFs konsernkontoordning etter søknad frå idrettsrådet og vedtak frå Idrettsstyret.
- (7) Disposisjonar av ekstraordinær karakter eller vesentleg omfang i høve til idrettsrådet sin storleik og verksemd, også låneopptak, skal vedtakast av årsmøtet. Årsmøtet bør vedta eit særskilt fullmaktsreglement knytt til slike disposisjonar.

IV ÅRSMØTE, STYRE, UTVAL MV.

§ 12 Årsmøtet

- (1) Årsmøtet er idrettsrådet sitt høgste styringsorgan, og skal heldast kvart år **innan utgangen av mars**⁸ månad.
- (2) Styret i idrettsrådet kallar inn til årsmøte med minst ein månads varsel, til dei idrettslaga som har representasjonsrett, samt til idrettskretsen til orientering. Innkallinga kan vise til at saksdokumenta vert gjort tilgjengelege på internett eller på annan forsvarleg måte. Ved innkalling skal det presiserast at delegasjonar skal vere sett saman i samsvar med NIF-lova § 2- 4. Framlegg som skal handsamast på årsmøtet må vere sendt til styret seinast to veker før årsmøtet. Fullstendig sakliste og andre nødvendige saksdokument med framlegg må vere tilgjengeleg seinast ei veke før årsmøtet.
- (3) Ved innkalling i strid med regelen, avgjer årsmøtet høvesvis ved godkjenning av innkalling og godkjenning av saklista, om årsmøtet er lovleg innkalla og om det er saker som ikkje kan handsamast.

⁹ Idrettsrådet må halde årsmøte for handsaming av rekneskap for året før innan utgangen av juni det etterfølgjande år.

(4) Årsmøtet er vedtaksført med det tal godkjende representantar som møter.

(5) På årsmøtet kan ikkje handsamast framlegg om endring i lov eller reglar som ikkje er ført opp på utsend/kunngjort sakliste. Andre saker kan handsamast når 2/3 av dei frammøtte med stemmerett vedtek det, ved godkjenning av saklista.

§ 13 Representasjon på årsmøtet

(1) På årsmøtet i idrettsrådet møter med stemmerett:

- a) Idrettsrådet sitt styre.
- b) 2 til 5 representantar for kvart idrettslag etter skala fastsett av årsmøtet.
- c) Representantar for bedriftsidretten etter skala fastsett av årsmøtet.

(2) Representantar må vere valde på årsmøte eller oppnemnde av styret etter fullmakt.

(3) Samarbeidande organisasjonar kan gjevast observasjonsstatus med talerett.

§ 14 Leiing av årsmøtet

Årsmøtet vert leia av vald(e) dirigent(ar). Dirigenten(-ane) treng ikkje vere vald/oppnemnd representant.

§ 15 Årsmøtet sine oppgåver

(1) Årsmøtet skal:

- a) Godkjenne dei frammøtte representantane
- b) Godkjenne innkallinga, saklista og møtereglane
- c) Velje dirigent(ar), sekretær(ar)⁹ og 2 representantar til å skrive under protokollen
- d) Handsame årsmeldinga
- e) Handsame idrettsrådet sin rekneskap i revidert stand
- f) Handsame forslag til arbeidsprogram. Drøfte og prioritere planar for anleggsutbygging og aktivitetsutvikling
- g) Handsame forslag og saker
- h) Vedta budsjett
- i) Gjere følgjande val:¹⁰
 1. Leiar og nestleiar
 2. 5 styremedlemer¹¹ og 2 varamedlemer, som skal veljast som 1. og 2. varamedlem
 3. Revisor med vararevisor¹²
 4. Representantar til idrettskretstinget eller gi styret fullmakt til å oppnemne representantane
 5. Valkomité med leiar og 2 medlemer og 1 varamedlem for neste årsmøte.

⁹ Referenten(-ane) treng ikkje vere vald/oppnemnd representant.

¹⁰ Dette er minimum av dei tillitspersonar som skal veljast på årsmøtet. Årsmøtet kan i tillegg velje andre tillitspersonar det er behov for.

¹¹ Tal styremedlemer vert fastsett ved vedtak av lova. Styremedlemene kan veljast til spesifikke oppgåver

¹² Idrettsråd med årleg omsetnad på meir enn kr 5 millionar plikter å ha engasjert revisor, jf. NIF-lova § 2-11, og må ta inn følgjande som ny bokstav i) i § 15: «Engasjere statsautorisert/registrert revisor til å revidere idrettsrådet sin rekneskap». Bokstav i) vert flytta til ny bokstav j) og bokstav j (før bokstav i) punkt 3 må endrast til «Kontrollkomité med minst 2 medlemer».

(2) Leiar og nestleiar skal veljast enkeltvis. Dei andre medlemene til styret skal veljast samla. Deretter skal varamedlemene veljast samla, og ved skriftleg val vert rekkjefølgja avgjort i høve til stemmetala.

(3) Bedriftsidrettslaga i kommunen vel ein styremedlem, med varamedlem, som tiltrer styret i idrettsrådet.¹³

§ 16 Stemmegjeving på årsmøtet

(1) Med mindre noko anna er fastlagt i denne lova, skal eit vedtak for å vere gyldig, vere gjort med vanleg fleirtal av dei avgjevne stemmene. Ingen representant har meir enn ei stemme. Ingen kan møte eller stemme ved fullmakt. Blanke stemmer skal reknast som ikkje avgjevne.

(2) Alle val skal vere skriftlege, dersom det ligg føre meir enn eitt framlegg, eller det vert fremja krav om det. Dersom det skal vere skriftleg val, kan berre føreslegne kandidatar førast opp på stemmesetelen. Stemmesetlar som er blanke, eller som inneheld kandidatar som ikkje er føreslegne, eller ikkje har det tal det skal stemmast over, tel ikkje, og stemmene skal reknast som ikkje avgjevne.

(3) Når eit val vert halde enkeltvis, og ein kandidat ikkje oppnår meir enn halvparten av dei avgjevne stemmene, skal det vere omval mellom dei to kandidatane som har fått flest stemmer. Står kandidatane likt etter omvalet, vert valet avgjort ved loddrekking.

(4) Når fleire skal veljast ved ei røysting, må alle ha meir enn halvparten av dei avgjevne stemmene for å vere valde. Dette gjeld ikkje ved val av varamedlemer. Om ikkje mange nok kandidatar får dette i første omgang, er berre dei valde som har fått meir enn halvparten av stemmene. Det vert så bunde omval mellom dei kandidatane som står att, og etter denne røystinga er dei valde som har fått flest stemmer. Står nokon likt etter omvalet, vert dette avgjort ved loddrekking.

(5) For å vere gyldig, må val vere gjennomført i samsvar med NIF-lova §§ 5 til 7.

§ 17 Ekstraordinært årsmøte

(1) Ekstraordinært årsmøte i idrettsrådet vert innkalla av idrettsrådet sitt styre minst 14 dagar på førehand etter:

- a) Vedtak i styret i idrettsrådet
- b) Vedtak på årsmøtet i idrettsrådet
- c) Vedtak av styret i overordna organisasjonsledd
- d) Skriftleg krav frå 2/3 av dei idrettslaga som har representasjonsrett.

(2) Ekstraordinært årsmøte vert innkalla direkte til laga med representasjonsrett.

(3) Ekstraordinært årsmøte er vedtaksført med det tal godkjende representantar som møter.

¹³ Bedriftsidretten lagar eigne rutinar for val av styremedlem og varamedlem, og melder dette til idrettsrådet sitt styre/årsmøte.

(4) Ekstraordinært årsmøte i idrettsrådet skal berre handsame dei sakene som er med i vedtaket eller i kravet om innkalling av årsmøtet. Sakliste og nødvendige saksdokument skal følge innkallinga.¹⁴

§ 18 Møte/fellesmøte

Idrettsrådet held møte med idrettslaga etter behov, og tek sjølv avgjerd om arrangementsforma.

§ 19 Idrettsrådet sitt styre

(1) Idrettsrådet vert leia og forplikta av styret, som er idrettsrådet sitt høgste organ mellom årsmøta. I styret i idrettsrådet er det med leiar, nestleiar og **fem** medlemmer, og 1. og 2. varamedlem.

(2) Styret skal¹⁵:

- a) Setje i verk årsmøtet og overordna idrettsstyremakter sine vedtak og avgjerder.
- b) Syte for administrasjon av idrettsrådet og representere dette utetter.
- c) Arbeide med saker som er nemnde i § 3.
- d) Etter behov oppnemne komitear/utval og utarbeide mandat/instruks for desse.
- e) Gi uttale til idrettskretsen ved opptak av nye idrettslag i NIF.
- f) Sjå til at idrettsrådet sine midlar vert brukte og forvalta på ein forsiktig måte i samsvar med dei vedtak som er gjort på årsmøtet eller av overordna organisasjonsledd. Styret skal vidare sjå til at idrettsrådet har tilfredsstillande organisering av rekneskaps- og budsjettfunksjonen, og har forsvarleg økonomistyring.

(3) Styret skal halde møte når leiaren bestemmer det eller eit fleirtal av styremedlemene krev det.

§ 20 Komitear

Idrettsrådet skal ha valkomité som skal veljast på fritt grunnlag på årsmøtet i idrettsrådet, etter innstilling frå styret. Valkomiteen har som oppdrag å leggje fram innstilling på kandidatar til andre tillitsverv som skal veljast på årsmøtet. Medlem av valkomitéen som sjølv vert kandidat til verv, pliktar å tre ut av valkomiteen.

V. ANDRE REGLAR

§ 21 Allmenne disiplinærtiltak og straffesaker.

For allmenne disiplinærtiltak og straffesaker gjeld NIF-lova § 11-1 og §§ 11-3 flg.

§ 22 Lovendring

¹⁴ Innkallinga kan vise til at saksdokumenta vert gjort tilgjengeleg på internett eller på annan forsvarleg måte, jf. NIFs lov § 2-19 (2).

¹⁵ Dette er eit minimum av kva for oppgåver som skal leggjast til styret. Det er ikkje noko i vegen for at det kan gjerast vedtak om at styret skal ha andre oppgåver i tillegg.

(1) Endringar i denne lova kan berre gjerast på ordinært eller ekstraordinært årsmøte i idrettsrådet etter å ha vore ført opp på saklista, og krev 2/3 fleirtal av dei avgjevne stemmene.

(2) Lovendringar som følgje av endringar i NIF-lova, trer i kraft straks. Lovendringar vedtekne av idrettsrådet sjølv trer ikkje i kraft før dei er godkjende av idrettskretsen. Godkjenninga er avgrensa til dei reglane som NIF-lova omfattar.

(3) I samband med godkjenninga kan idrettskretsen påleggje nødvendig endring for å unngå motstrid med NIF sitt regelverk.

(4) Endring i §§ 22 og 23 kan ikkje vedtakast av idrettsrådet sjølv.

§ 23 Oppløysing

Idrettsrådet kan berre oppløysast av idrettskretsen. Ved oppløysing eller anna avbrot av idrettsrådet, går idrettsrådet sine overskytande midlar etter avvikling til eit føremål godkjent av idrettskretsen.